

江陰縣志卷之十八

人物三

行誼傳

宋曹 址字天基父鏞寶謨閣直學士立朝有聲址美丰儀博經史淳祐間理宗爲魏郡長公主擇配址以才望與選能偕孝事父母時南北構釁朝政日非址剴切陳封事值賈似道擅政遂謝朝請德祐改元挈公主歸里晦跡田野建祠贍族周恤鄰友凡鄉里義舉悉踴躍爲之子五煥之烜之爍之耀之燦之並以門閥顯於朝

明夏 順字良惠少業儒工書法長而倜儻好義宏治中

江陰縣志

卷十八

人物 行誼

一

奉詔輸粟千石賑飢例當旌力辭又輸金助邊例得三品武秩亦辭巡撫強之授鎮江衛指揮使生平築城建水門修院署學舍治橋梁插壩及蠲租折券諸義舉不可殫紀

夏 黼字良臣奉詔助邊授鎮江衛指揮使僉事

許 輔字良佐輸粟三千石賑飢賜七品秩

徐元穀字尚實穎敏工詩輸粟雁門等關詔世襲蘇州衛指揮同知

孔尚存字燕申好善樂施有貧士自塾中歸路失修脯款畱信宿如數周之三舉郡邑賓筵其族興經字元贊好

友尚義建培先橋歲稔煮粥賑飢巡方使者旌之

孔 抃字通甫慷慨好施郡邑大工役必身先之設糜施藥掩道殣收貧族置義冢義祠甃橋梁衢道眾善並舉舉鄉飲介賓

黃 淮字永澄書學顏歐又規姜立綱年八十餘能作蠅頭楷榜書尤可觀嘗爲掾史御史陳九德具疏稿劾邑令趙錦命淮書泣不下筆具白趙治狀竟得改登薦牘李鵬翀字程叔諸生負奇氣嘗手書海忠介直言天下第一事并糾劾嚴嵩張居正諸疏示其子應昇曰食人祿不當如是耶應昇爲南康推官冰蘖自矢每舟載絲粟

江陰縣志

卷十八

人物 行誼

二

酒脯資之及應昇爲御史見其先後擊奸諸疏歎曰有子如此不負所生矣應昇斃詔獄客有爲苦語過慰者曰無然僕今日乃得長有子耳崇禎初被恤典由御史晉封太僕卿當事式廬致敬鄉邦利病必侃直指陳嘗建橋以便行旅人名之曰李公橋

張履道字我坦汝翼子天性純一少孤母范教之嚴履道事母如父補諸生年四十卽棄去惟以依親聚順爲樂日所見聞及所行事纖悉必告母居身以誠爲本不妄受人纖介仲子有爲字爲之諸生天資樸厚少受學於從兄有譽有譽嘗稱其身無一命而常懷濟人之志年

近六旬而不失赤子之心

國朝順治間舉鄉飲介賓

曹尚志字廉公歲貢生父懋仁性方嚴尚志承父範身率諸子以禮法孝事其親兄亡撫其孤弟亡恤其嫠徼民冒籍江陰暮夜投金欲求保正色拒之同郡有僞舉節義者卻其厚餽不與勘呈爲諸生二十餘年兩獎優行子玘見文苑傳玘字子瑜崇禎己卯舉人鼎革後絕意進取闢蕪園詩酒其中著有蕪園詩草玘字子求珮字子佩皆工詩畫伯仲相友善時稱四絕

陳科字晴湖諸生有才行文震孟延致家塾時長洲令

江陰縣志

卷十八

人物 行誼

三

有疑獄科聞爲力解得釋其人往謝諱之夏樹芳嘗曰晴湖非惟恐人知其德并不自知其德也兩舉賓筵不赴

李開字美儒宋忠定公後諸生與弟至清俱有才名開尤恂恂質行至清忤豪右被誣死懼開之不反兵也賂墨令禠其籍墨刑而城旦之居三十餘年邑令李令哲始白之爲復籍初開旣罹難卽從友人宦游天啟中時相顧秉謙招之往見所爲鑿枘浩歎歸性侃直遇人有過規誡不少隱然和氣盎溢鄉里親之傷至清寃死每念及卽涕零故所著名獨被齋稿

薛鍾价字季藩性孝友父沒哀毀幾不欲生侍母疾衣不解帶幼習舉子業卽慨然曰羔雁固舍此蔑由但吾儒所學者大豈止爭長帖括閒耶年十九補諸生累試不售曰士君子遇則法前人眞事功不遇則法前人眞學問手訂五經大家集儒先語錄不下數百卷著求放心說慎交游嚴取予甘澹泊扶掖後進多所成就

夏寶忠字孝珍樹芳子繆文貞器之字以女性慷慨好施吳中士夫皆樂與交由廩貢生例授文華殿中書雖處草莽朝亡閒否泰之機言之瞭如修刻家乘封植先壙周恤貧族士論多之子世錄字輿先好學能詩伉爽有

江陰縣志

卷十八

人物 行誼

四

父風徐介立大育頭陀皆舍於其家刻大育頭陀詩集行世孫貽典字文初亦以文鳴

繆堅白字采瓠文貞第五子性孝友文貞罹奄禍哀痛不欲生悲號流血數十年猶一日鏃礪名行教子孫無裘馬輕肥習閒居典籍自娛雖跛手枵腹尋覽不輟富於腹笥談論經史斐亶不絕與人交悃悞無華其質直有過人者

包 玉字君攻積書盈座研味不輟

國朝順治間徐趨黃毓祺舉兵事敗獄連玉逮玉至江甯當事與有舊欲脫之玉不可詢其故玉言與同里某誓生

死相共不忍獨生以負某當事義之并寬某罪

國朝劉振時本姓張祖禱於劉武穆而生遂爲姓事親以孝
聞僑居常熟與金景寅莫逆偕謀什一之利所入無纖
毫欺衣服器皿不問爾我執猶子禮於景寅父歿爲視
含殮振時有疾苦景寅亦醫禱省視兩人共休戚者二
十年如一日兩人耄且病或以異姓同居後不可繼勸
之分析兩人不忍遠離卜宅衡宇相對人高其行稱城
東二義立傳作詩美之

徐敏傳字元發年十七補諸生重然諾樂施予父歿遺券
一篋凡數千金悉焚之有以女鬻者詢爲儒家子立遣

江陰縣志

卷十八

人物 行誼

五

還贈以衣飾俾擇良耦世業沙田值颶風壞田廬民乏
食出粟賑之全活甚眾家多藏書遭革運避兵江村猶
攜經史數簏於頽垣破壁間諷誦不輟順治甲午鄉試
首薦主司以卷中有四字疵類抑之遂絕意科目築澹
園於東城遠近名士載酒問奇倡酬甚富子德敷字永
一能文早卒德求字永孚敦行誼詩古文稱於時德容
字永宏伉爽有父風

惠 疇字亮采順治乙未進士太平府教授通志載其爲
德於鄉澹谷瀆港建文星樓請當事永免楊舍徭役里
人德之

劉國符世業醫康熙初大疫多所全活素性義俠關蠹越詐爲民害五控大吏碑禁之子景義承其學治病多效後人希董希宏世其傳希董諸生

包龍章字被五諸生讀書不沾沾章句畱心農田水利兵制諸書以氣概聞里中初濬墅關設巡船越境擾民龍章憤甚率眾逐之關吏訴於邑令將興大獄龍章控於巡撫湯文正捕關吏論如律巡船由此知戢無錫吳孝子衣若走萬里省親其子禹三年十三寄居僧寮病且殆龍章聞之挈至家妻以女甥及孝子扶父喪歸復多方欣助之其過豪強濟急難雖坐是幾破其家卒不悔

江陰縣志

卷十八

人物 行誼

六

子澤字嗣遠諸生傾資建家祠友愛兄弟人謂包氏世德云

劉 昭字亮采諸生性孝友有文名行己端方與人忠信其教生徒一以敦品窮經爲先務學者咸推服之

祝邦基字頌山端方誠慤識趣超遠教子弟循循有規矩與人和樂克以古處自敦由監生考職當選不赴陳恪勤爲題黃綺高蹤額晚年纂集儒先格言參以己意著裕後格言一書以訓後昆所言皆修齊之要既卒楊文定表其墓子鑑中字元亮監生居心仁厚操行謹嚴事父母晨夕不離父有疾禱於天願減己算以代兄弟五

人友愛無間性好周恤捨棺施藥皆所不吝

張士傑字爾奇父歿毀瘠盡禮時諸弟皆小弱士傑手勸田產與諸弟均析無所私曾兩還遺金士傑兄弟六人多尚意氣士偉士傑見忠義傳士俊見孝弟傳士傑子世沐字采邑有孝行孫斗瞻字拱亭諸生亦敦孝友終身孺慕愛諸弟不以嫡庶有閒遇水災首倡捐賑有鬻子女爲奴婢者出橐金贖焉斗瞻子文燿字宏耀監生歷試有聲早卒

邢楚玉字鉉吉諸生事父母竭情盡慎父以暴疾卒恨不及醫藥屢絕復蘇與異母兄弟五人和好無閒少與楊

江陰縣志

卷十八

人物 行誼

七

文定耿人龍以文行相砥礪年三十疾革口占無慚君子勤修德不辱先人凜受書句以勗子姓著有周易節解藏於家

湯鼎新字繼序諸生少與兄燦齊名燦嗣姑爲高氏後仍兄弟相依切劘文行鼎新名籍甚當道爭延致之每遠歸日與兄聚處劇談作孺子懽兄不先坐不坐不先食不食白首如一日也性喜獎借後進人咸樂就之

王樞字維周飭躬勵學累試首拔杜門課徒於世味泊如也郡丞王琦重其品延爲師有構訟者奉十鍰請關說叱拒之旣而歎曰吾豈以宦館累吾品耶辭歸

蘇濱字岷江先世家新安父霖始卜居邑之周莊以隱德聞濱工詩文善書補諸生由貢薦授國子監學正遷行人以親老謝歸事親滌滄甘旨竭盡誠敬篤愛異母弟朝宗析產時舍肥取瘠葺學宮修祠廟育嬰贍乏諸事咸踴躍樂爲疾革猶勗子孫力行不怠壽八十二仰觀光字國賓增生嘗應鄉舉次丹陽拾遺金一篋憩道旁以待少頃有人倉皇至乃負官稅鬻產以償者急還之其人感泣叩姓名不告而別弟奎光字薇映亦以卻色聞時稱二難

嚴繼光字致遠諸生孝友之稱鄉黨無間當事重其行推

江陰縣志

卷十八

人物 行誼

八

舉鄉約地故荒僻業儒者少繼光請於令撤靜室爲義塾鄉人賴以知學

孔衍美字成之樂善好施地有青龍浜岸高數丈內田三百餘畝灌溉不及耕者病之康熙間大旱民飢衍美出粟集眾築壩濬溝洫悉成沃壤及病革並命子孫公置田五畝積粟以資歲修

嚴文起字起八監生侍母疾衣不解帶者彌月值時厲疫出三百金製藥療之歲荐饑輸粟百石爲糜以賑勇於爲義施德不望報有高郵某鬻女泣別難捨文起見之令弗鬻贈金飲之

孔敏渠字正坤抃曾孫醕謹自好樂善好施有祖風凡修
建利濟事率先倡捐有貸千金者貧不能償焚其券
劉紫宸字翼微增生績學砥行廉隅自飭從外父陳其難
參究易理多所發明

葛 霆字堯中撫辰子諸生至性純篤爲父請旌孝行以
家貧不得上請者十餘年卒成其志乾隆間總督奉
詔舉報善人第一榜列邑署申明亭各大吏又統給孝可風世額
著有道成山人集

夏宗洛字參三敦仁子諸生文行並高繼父志偕叔敦禮
文彬弟宗淮力行諸利濟事邑有育嬰堂久廢首倡重

江陰縣志

卷十八

人物 行誼

九

建規制事宜擘畫盡善不辭勞瘁

徐 澍字沛侯性行純篤幼失怙昆弟間曲盡友于親黨
有急者厚賙之

須繼宗字近江少孤遭兵燹奉母以居竭力致養教子以
義方門內整肅無譁聲歲時家祭侍立垂涕不忍遽徹
歲暮見鄰里不舉火者潛持金贈之勿令人知構屋於
北城外施茶湯以惠行旅壽七十六子翔之亦仁厚好
善

汪 洪字紹先監生持身恭謹大度容人橫逆之來輒弗
較侷儻好施里有貧而自好者負米夜投其戶其人

覺而追謝洪輒諱之歲稔囊粟泛舟邑東往來以給貧
乏有惡少冀全獲之擲以瓦石洪棄舟任所取卒不以
自沮也

王謙吉字萬服性純孝四齡失母哀慟欲絕順事繼母晚
失明護持益力兄弟友愛甚篤親族待舉火者日數十
人有婚娶不時殮葬無具者必資給之家有婢十數人
既長厚遺之不索直有高郵某負千金貧不能償焚其
券與陳均爲一錢會廣行利濟奉功過格甚謹至老不
倦築環山樓藏書萬卷名流過訪無虛日宜興任啟運
贈詩紀之

江陰縣志

卷十八

人物 行誼

十

馬卿輔字秉衡性沈摯克敦倫紀父逢元官陝西參將母
李卒於署卿輔聞訃五千里奔喪泣血匍匐哀感路人
族子女有以貧故陷爲僕婢者贖之歸並給贍養完婚
嫁壽八十

王心定字子欽少服賈利恆倍徒營卒某將鬻女償官逋
贈以金止勿鬻某德之止宿以其女薦心定大駭欲出
而戶已扃乃整衣危坐達旦而去

祝應璣字貳琰以縣郡院三試俱第一遊庠學使彭文勤
胡文恪咸器之終廩貢生應璣博學工詩文兼通六書
學善籀篆書爲人和不詭俗善不近名爲人師以身作

則及門率多循謹士居恆事親孝與弟應瑤友愛篤至
一時推爲學行淳實云

陳 瀾字鷺泉乾隆丙午舉人攻苦力學務求實用邑有
公事必侃侃正言曾不媵司徇俗嘉慶間改造由單議
起瀾謂此奸胥之利非所以安農業力爭得寢以例分
發湖北候補同知假歸值邑大饑議兼辦糶賑時有主
糶而輟賑者瀾曰有錢易米者雖并日而食猶可得生
而無錢之家不賑將坐斃眾聽其議推瀾主其事悉心
籌畫多所全活尋赴湖北攝武黃同知篆束吏胥謹巡
防不事苛刻而政肅以養母歸子九如字廉夫兩浙候

江陰縣志

卷十八

人物 行誼

十一

補鹽運使司鹽運副使性謹嚴喜施與歲值旱澇輒倡
率平糶仍捐鉅貲助賑全活者甚眾學使廖鴻荃貽以
爲善最樂豈望報乎積德必昌將有興者聯句孫榮紹
字子惠咸豐癸丑進士戶部廣西司主事浮沈郎署幾
二十年性耿介能文章喜獎掖後進一時從學多掇巍
科梓有憶停雲館文稿

祝登墀字賡敷職監生才高行篤見義奮發勇爲自士夫
以至寒畯咸樂與交爲人謀無不忠遇郡邑公事當道
及都人士悉以才望相倚重如肸飾廟學繕完書院平
治橋道勸葺忠義節孝祠宇以及恤飢寒扶困阨旣身

任其勞有不足輒探囊取給絕不瑣瑣計較道光癸未歲大祲己萃邑之有力者發賑十次復獨輸一賑繼之族有舊宅數十厦災於火多露處者登墀爲一一購居而以其址出鉅費勸立宗祠生平利濟之功公私交賴凡經其區畫必委曲爲久遠計學使白鎔稔其賢書爲善最樂額貽之年四十五卒里黨莫不惋惜

孫殿魁字端崖援例入成均納州同職有孝行生平慷慨好施樂善不倦幼卽善事嗣母本生母嘗邁疾刲股以進疾旋瘳初曾祖鴻儒有創建義莊之志厥緒未竟殿魁偕族姓有力者集田千畝踵成之嘉慶丁卯甲戌旱

江陰縣志

卷十八

人物 行誼

十二

道光辛卯癸卯水鄉黨貧民艱於謀食始則出粟平糶繼則捐金施粥故學使廖鴻荃有觀真性情好行其德具大願力相與有成聯語之贈尤重文學士舉文社多方以鼓勵之嘗捐千金以資書院膏火龔文恭公督學時所以有藝林培秀贈額也其他若建閘修橋暨地方善舉靡役不從悉臻妥善絀於經費者輒獨力承之邑人咸稱盛德云

徐 彰字季韜嘉慶甲子舉人大挑教職性方正足跡不履公庭家居授徒博館穀以修色養誘掖後進多所成就

馮 治字文園少孤無以養祖母乃投縣充掾吏然非其志也旋謝去援例就貢生性伉爽善排難解紛人多倚之邑中公事必以身先如修城濬河賑飢及建造公所殫精籌畫費省而工倍其經理書院也清釐挪款三千餘兩復因經費支絀解囊以資膏火學者深相推服學使瘳鴻荃以導人以善使人自勉修德於鄉其德乃長及情殷濟乏聯額貽之祁文端又以望洽士林貽之邢 鈺字雲驤家業饒裕有幹才邑有大工大役咸資助理道光癸未庚子己酉三次水災辦理賑務尤爲竭力鄉民或有忿爭得鈺排解無不渙然以故人甚多之

江陰縣志

卷十八

人物 行誼

十三

季 忻字薇堂諸生性孝友母病刲股療之平生專心利濟勇於爲義會歲大水修築芙蓉馬家圩堤岸堅固蓄洩便利又創建登仁堂及救生局皆至今賴之

孫 鏞字玉衡國學生秉性直方捐田贍族籌辦義莊歲歉賑飢力爲倡率鄉人德之

張師善字苻洲援例就按察司經歷好施予地方要舉輒解囊助之咸豐初當軸檄籌軍饟師善輸資尤鉅十年邑人王元昌糾集民團捍衛閭里復出私財支應有毀家紓難之風焉

陳式金字以和以同知分發浙江不赴持躬端謹秉性恬

澹邑有義舉解囊無吝色尤好行隱德蓄法書名畫精
於鑒別善山水得元人超逸之致寸縑尺楮人皆藏弃
寶惜之嘗構別業於宅畔穿池疊石林木翳然名曰適
園見古蹟

莊 墀字步丹太學生援例就職家世積累財產雄一鄉
爲人恂悞無華道光二十九年水月城夏城兩鎮地形
窪下受災尤重獨出貲數千緡加意賑卹鄉里德之

沙 淮字磬濱增貢生試用訓導性沈靜重然諾捐貲助
善鄉里以任恤稱凡修葺城垣疏濬河道建造衙署諸
大工靡役不從條理秩如不辭勞瘁當道咸倚重焉同

江陰縣志

卷十八

人物 行誼

十四

治十年重游泮水學使彭久餘給泮藻重贖額卒年八
十有六

隱逸傳

唐魏璞字不琢才高志曠杜門二十餘年飯蔬績學工詩文與皮日休陸龜蒙友善每秋風時乘短舸載酒偕浮游煙水間皮陸各有贈詩稱爲古君子

宋劉谷字季樸有隱操熙凝間爲修撰尋辭去蔣靜自宜興來學谷一見奇之妻以女及卒靜輓以詩云行詣己書丞相筆姓名還結裕陵知又云他日如尋隱君子女山深處一孤墳

趙越字彥仲少隸成均籍中年絕意名利寄情巖壑葛文康志其墓稱爲古賢者

江陰縣志

卷十八

人物 隱逸

十五

元千十一不傳其名仕宋爲承仕郎宋亡隱梧塍里宋濂贊曰擾擾之際一繩莫維岌岌之下一木難支所以先生飄然去之覽輝之鳳豈樊籠之可羈奮天之鴻豈網羅之是罹卓哉先生其四皓之徒歟今梧塍徐氏家譜載千十一江陰支千十三宜興支

明焦丙高帝故人洪武初下詔徵求甚急恐爲有司累乃謁帝於金陵持雞酒直馳甬道入與帝班坐飲如微時帝出金玉角三帶任自擇取角者授千戶無何掛帶於高橋門而去不知所之

杏林叟董姓匿其名隱居暨陽山或云董奉之後嘗遇異

人授鍼術能立起人危疾或欲報以貲第令種杏一株
舍傍曰吾聊繼吾祖志耳久而成林人因以杏林叟號
焉嘗曳杖林下歌曰杏之花其下我家杏之實其美我
食吾甯舍是兮而從人於役叟蓋賢而逃於醫者高啟
爲作傳方之陳畱老父漢陰丈人

張 煦字孟和少工文靖難兵起見名流攫慘禍遂絕意
進取蕭然野服與物外交徜徉山水非風雨未嘗輟興
至則吟然不自愛惜故有詩草稀存異放翁句壽八十
餘卞榮題其墓曰匪官而貴不祈年而壽不沽名而永
譽可謂潛德矣

江陰縣志

卷十八

人物 隱逸

十六

繆元贊字汝化少任俠晚乃折節讀書工隸書善畫與俗
手迥異屏居西花山之村塢小橋流水花石楚楚雖豆
棚蔬圃亦別有位置製一櫝日勤拂滌山僧野老至則
相與坐嘯其旁壽九十餘

夏 觀字叔度元主簿淵子品高行端名利不關於心與
倪瓚爲煙霞契友逍遙終老人謂雲林風格惟叔度足
與頡頏

鄧欽文字徵甫詩逼唐人行楷書得趙承旨法畫工寫意
爲黎惟敬胡元瑞所推重有鄧山人集行世其遊天台
石屋詩有云今來好共煙霞臥咫尺仙踪亦易求卽此

可見其槩

曹 驂字子進宏子諸生學使者目爲三吳才子善丹青
及鍾王書法尤精孫過庭體爲詞賦亦卓犖可誦其祖
忠曾令分宜識嚴嵩於童子時嵩得柄每召驂謝不往
嘗於舟中吟一聲禪誦下滄浪之句時唐寅在鄰舟聞
而訝之曰得非曹溪堂先生乎邂逅定交而去

季 芬字蕙纒郡諸生家貧簞瓢宴如博極羣書通天文
術數風角鳥占尤精先天養氣之旨好吟詠著長春境
日記等書茂苑諸名家皆師焉隱居鄧尉山中坐化去
鼻筋垂尺許

江陰縣志

卷十八

人物 隱逸

十七

胡繼美字彙樸諸生讀書不治生產平生宗濂洛關浮屠
老而愈力鼎革後隱於雲亭幅巾野服與城市絕作詩
明志累數百篇年七十五卒遺命以故服斂

徐 益字仲謙家貧不事干謁陋巷一塵蕭然自遠能詩
善隸書山水仿沈石田貌蟹尤入神每興至卽雨雪亦
著屐登山吹簫放歌與人交澹而永令長式其廬壽九
十一與沈鷺許學夷並推爲滄洲詩社領袖

薛 樞字思亭進士格之弟性恬退工詩日以吟詠自適
子侃字雲萍紹其學著有三鳳遺音集

沈 衍字啟昭孤貧志學以家無藏書爲人傭書寓目卽

能成誦因博極經史終身不娶以友爲家遇貴介歌舞
徵逐輒拂衣去晚獨居一室躬自汲炊或寒餒甚有以
絲粟餉者必峻卻人目爲沈孤鴻友人鄧林良梓其詩
集

趙繹熙字祥宇歲貢生絕意仕進見璫燄大熾憤甚每以
吟詠發舒迨思宗殛璫喜而頌云神明天子初臨馭應
許忠魂叩九閻已而歎曰死可矣未幾無疾卒

吳文蒸一名文正貧無家依其甥以食謂世不可莊語遂
佯狂市上縱誕不羈魏璫擅權大書願天早殛魏忠賢
并其黨惡等語徧黏神廟天啟丙寅璫黨登君山文蒸
故出狂態嫚罵之從人見其老且顛竟舍之去生平好
撫一弦琴吹兩眼簫每獨坐山間出琴笛奏之以自娛
樂壽九十餘

趙 遇字鳳濱知書慕古爲人不欺性好遠遊尤好飲飲
有奇量當遊楚時路值虎欲攫之遇方醉正色曰吾平
生有愧心事任汝食否則可速避虎搖尾去遇神色不
變

程如嬰字宴如十歲卽善屬文天啟辛酉秋試分校吳麟
瑞得其卷必欲置之解首反見遺崇禎末由貢薦授縣
職感時事不就偕朱衣選刻明詩歸如干卷平生篤於

行誼富於文章恥干謁耄年戢影蕭寺置世事於不聞
徐登階字鳳南壯歲棄諸生以治圃垂釣爲事茅齋數椽
擁書偃臥有貴介過輒以籬自障不妄與通甲申之變
麻衣慟哭者數日乙酉秋居人相率避兵登階獨不去
竟得免壽八十餘

沙萬里字應鵬中書復明子游郡庠不第耕於青山自食
其力竹屋茅簷僅蔽風雨性簡傲不入城市善爲古文
詩歌著有竹窗漫藁

徐宏祖字霞客年三十出游東南佳山水如東西洞庭天
目雁蕩俱窮其勝其游也從一僕或一僧攜一杖一襍

江陰縣志

卷十八

人物 隱逸

十九

被不治裝裹糧能忍飢數日遇食卽飽絕壁叢箐攀援
上下捷如飛猿每行數百里卽然松拾穗走筆爲記北
游燕冀嵩洛西上華山下青珂坪心動急歸母正危疾
母歿終喪益放志遠游訪黃道周於閩中周歷閩山勝
境崇禎丙子辭家西邁至崑崙窮星宿海去中夏三萬
四千三百里又數千里至西域參大寶法王還過滇足
疾不能行麗江牧延修雞足山志具筍輿送之歸語人
曰古來題名絕域者漢張騫唐元奘元耶律楚材三人
而已吾以老布衣孤筇雙履得與三人爲四死不恨矣
聞道周下詔獄遣子往視返具述狀浩歎不食卒郡守

張宗連功德在民祠毀嘗捐貲重建所著遊記

國朝採入四庫全書孫建極字範中諸生能文章

國朝李 寄字介立即徐介立母周氏徐宏祖妾方孕而嫡
嫁之以育於李氏故名李寄又以介兩姓歷兩朝故自
命介立性穎異好學少應郡試拔第一既而悔曰奈何
以文字千榮哉棄去奉母居定山終身不娶母卒隱由
里山之山居菴號由里山人張有譽方貴徒步請見踰
垣避友人曹志雲憐其寒贈之衣卻不受郡司馬邑令
皆欲一見不可得陸次雲以風雅自命得其詩甚重之
著有天香閣集歷代兵鑑輿圖集要藝圃存稿及生平

江陰縣志

卷十八

人物 隱逸

二十一

所爲詩累二百餘卷初霞客遊記原藁遭兵燹失去介
立於宜興史氏訪得之類輯成帙年七十二卒於釣臺
村夏氏執友夏寶忠斂葬之山居菴旁

大育頭陀姓張氏名印頂明諸生少負雋才謂人生當效
班超馬援立功萬里外遭國變嘔血數升有句曰滿地
蘆花和我老舊家燕子傍誰飛又曰甯可枝頭抱香死
何曾吹墮北風中既往來秦淮見銅駝荆棘呻吟夢寐
悉發爲詩歌生平精音律彈離騷每一動操牢騷哀怨
聽者唏噓欲絕晚年奉佛自號頭陀無何坐化去

劉蓼雪字蔓坡諸生值甲申之變棄妻孥往來吳粵間自

號盲蟲或衣敗絮攜筐如乞者狀汲汲狂走呼之不應
金陵城中相傳有人哭於孝陵者七晝夜不絕聲杜濬
曰此必盲蟲也覘之果然乃相持大慟而歸常臥市上
仰天嗚嗚或仆地輾轉如大疾苦狀曰天喪予天喪子
年八十五卒於道

黃 鍾字呂侶諸生從顧端文高忠憲遊以理學著忠憲
罹禍往哭祭歸卽棄衣巾自號覺浪丈人隱居村野不
入城市鼎革後發癩疾日夜坐山巔咄咄如與鬼神語
如是以死

陸 蘇字望來諸生國變舉家遷於舟漂泊海濱冠婚皆

江陰縣志

卷十八

人物 隱逸

二十一

在舟中業捕魚令童子攜入市易米以炊風雨之夕輒
仰天長號至聲啞不能出語識之者掉艇來訪皆以書
代語年五十病革遺命葬海島

任光胤字久徵博學好遊工詩詞書畫廣交四方才子與
同邑黃毓祺戚藩最友善著有眾香堂集三十卷晚好
釋氏注佛經數種

黃安雅字直方大澳子鼎革後敝衣破帽戚戚不自得居
廬不蔽風雨有所感觸輒見諸吟詠庭前雜植花竹竹
外菜畦數弓灌鋤以自給性耿介特立抱不可一世之
才踽踽涼涼甘老死而不悔子復字來初名諸生善書

學者爭師之每談及乙酉間事則慘然神瘁

薛延社字引百明諸生砥礪名節蕭然陋室吟誦不輟鼎
革後每忽忽不樂嘗獨行曠野北向號哭見者以爲狂
時作詩歌以見志子守典諸生能文章以孝聞嘗割股
療母疾著有鄰寸知諸集

王若水字聖功隱於市有詩癖嘗攜樽榼偕友出遊興至
輒吟其詠白燕詩云翦破碧波分素練浣殘紅雨不緇
衣人傳誦之從子時霖字萬溪性孤介不名一錢酷嗜
詩與若水吟詠必偕著有素風堂集

張 榮字耀先父早卒孝事母杜門鄉居徜徉煙水閒嗜

江陰縣志

卷十八

人物 隱逸

二十二

學好古於書無所不窺嘗曰世人積金我積書堆架萬
餘卷至老不倦易簣尙端坐手一編而瞑

孔毓案字山立性沖淡隱居教授好讀書貧不能購轉假
鈔錄寢食俱廢尤嗜游覽遇佳山水吟詠陶然

吳 鳳字翥仙負雋才事親孝結廬五峰之陽栽花蒔藥
吟嘯卒歲幾不知城市爲何所著有晚煙居集

夏世禎字友徵天資夷曠絕足城市結茅綺山之南布袍
羶巾髮鬢被領隱居訓徒佳客過輒與入室談論泉
石娓娓忘倦年七十七

耆舊傳

明韓騰芳字茂遠孝友博聞官中城指揮有幹畧崇禎間因鄉人誣誤致璫怒牽謫貴州旋以擒苗功復官授南陽同知甲申後棄官隱東郭之家園園有古梅千株皆三百年物客至詩酒爲樂登閣望北原荒冢曰對此如何不飲性不諧時俗遇才士輒下之壽七十餘時稱梅仙著有荷戟吟

陳錫袞字壘山舜卿子舜卿清節家貧錫袞好古力學浮沈諸生中五十餘年以筆札自給當道多重其著作天啟時邑令岑之豹索爲文人賀逆黨周應秋錫袞恥不

江陰縣志

卷十八

人物 耆舊

一二十三

爲曰吾豈王門伶人耶碎吾筆硯可也壽八十餘張繩武字世欽增生事親至孝老而不衰性慷慨不事家人生產一盡於養親葬親再竭於爲其祖袞建坊與崇祀各臺司旌其孝四方士大夫多稱之

黃鴻圖字與參諸生喜讀書手鈔口誦老而彌篤兼究心醫卜思以濟世布衣蔬食杜門撰述同時有朱嘉賓孝友力學長於詩邑令乞言著管見集睡覺吟行於世徐孔芬字樹原宋知軍葢知縣綱之後讀書樂道有聲膠序扶掖後進多所成就曹玘曹玘趙國權皆出其門

國朝順治間邑令武茂周敦致賓筵孔芬系出名宦先世遺

澤在人故子孫籍居此土者詩書之傳歷四朝弗替云
王從訓性純孝至老彌篤倡修五雲橋吳家橋壽八十餘
奚巽望字翼武諸生天性孝友閉戶著書壽九十三弟巽
萊字士見慷慨好施尊師睦族與兄友愛尤篤黃道周
重其人爲著德林擷閻壽八十三

夏九思字孟睿諸生品詣純慤與無錫鄒彥吉交莫逆彥
吉貴招之不往曰吾雖樂舊遊然不喜貴游也初童試
時邑令胡士鼈拔九思及其從兄樹芳繆昌期周憲章
等共八人深加器異諸子連翩起惟九思以青衿終

李際春字春臺以貢薦授丹陽訓導課士誠懇有法年老

江陰縣志

卷十八

人物 耆舊

二十四

告歸諸生競以詩送之

國朝沈之祐字綏我父性豪邁不治生產外侮交作之祐以
身任不貽父憂母早歿事繼母盡色養戚族友朋有告
靡不應

賜八品冠帶壽八十九

吳 法字尚之性長厚規言矩行少與李鵬翀繆昌期友
善兩舉鄉飲不赴子九人並能文芳權尤有聲同里勇
良武字奉川諸生焚券恤貧以好義著與法並年八十
餘

袁厥修字敏時增生廉介自處壽八十七子鳳儀字鳴瑞

監生樂善尚義

夏世安字宇磐歲貢生年十三補諸生才名籍甚學使蘇
銓胡在恪俱拔第一待以國士居鄉清白自守絕跡公
庭訓子積德行善

費拱道字大經性慈祥濟人緩急然諾不苟晚年頤養天
眞元氣渾然壽九十六子天與字啟賢州同職亦以耆
德稱

李 炳字虎文諸生存心利濟凡邑有興革當事倚重邑
令陶彝給壽德朋尊額

繆 植字深培歲貢生爲人和厚邑有公事悉心經畫著

江陰縣志

卷十八

人物 耆舊

二十五

有鳳邁集詩韻詞通韻譜選青陽縣訓導未任卒

張朝珍字志熙歲貢生年十四遊庠有文譽性喜施與居
鄉抑強扶弱課三子皆成名

徐 陞字君銓好學不倦鍵戶潛修歌吟不輟左圖右史
之外無他物也

曾國才字君盛醅謹誠愨著望鄉里邑令舉賓筵不就乾

隆丙辰

恩授修職郎壽九十

邢 曦字賓日性冲澹詩酒自娛弗問家人生產一琴一
杖望若神仙中人壽八十四子天錫字宗耀至性淵懿

事親恂恂色養友于兄弟平生易直慈和無疾言遽色

乾隆丙辰

詔舉耆儒碩德壽八十七

薛 達字梅峯性耽詩不屑屑於章句制舉業以散體行之屢試不遇年七十二始受知於學使張元臣極賞其古風一篇又二十年卒薛氏多文人而言詩家必以達與其從子元敏爲最

徐 岳字亮公究心河渠水利算數之學少與蔡鵬友善鵬令長沙招之賦詩辭曰瀟湘勞吏如相憶他日遲君錄野堂江西建昌尹某慕其名具禮聘甫一至論偶不

江陰縣志

卷十八

人物 耆舊

二十六

合曰予豈能爲人署尾耶拂衣歸會鵬自長沙返與同里趙鳴鑾稱三友壽九十一自稱乾一道人因名其集繆永泰字啟平從梅正平學易有心得每手錄前代諸老遺集其爲文古奧鮮知者會鮑開秉鐸月課得其卷大驚曰此夏鼎商彝也時永泰年八十矣曰自束髮操觚今乃得一知己不恨矣性耿介家居不蔽風雨竟以貧死

趙鳴珂字定涵性倜儻擅經濟才究心邊防海道河淮諸政例授州同知巡撫張聞其名延致河工欲薦用之以疾辭築壺天園觴詠終老著有籌海運掌圖社會未議

江防要覽諸書

趙 熊字呂侯增生受業婁東陸桴亭學大進以補賦註
誤遂棄帖括肆力於詩日與諸名士倡酬幅巾筇杖徜徉
山水同懷四人俱諸生文行砥礪互相師友白首無
閒言壽八十

郭其棟字蕙枝名宦庭堅裔孝友誠篤樂善不倦以子昌
烈封登仕郎壽八十六

孫允升字會嘉少有文譽尤長於詩以貢薦授含山縣司
訓課士有法謝歸築園五峯曰龍沙小隱且休庵觴詠
其中優游終老子謨字昭文由優貢舉孝廉方正任樂

江陰縣志

卷十八

人物 耆舊

二十七

安令有政聲

劉爾鼎字梅庵諸生言行修潔好揚挖先賢津津不倦祠
墓有頽圯者倡募修葺壽八十餘

章 溥字大來工文數奇舌耕自給巨室慕其名爭延致
之訓迪諄懇至老不倦著有學庸贅言

薛希暉字旭旦監生孀嫂湯氏勵節敬之如母里有北圩
渡船兩橋捐資修建行者呼爲薛公橋壽八十一

趙鉉文字羨茲植品方正矜勵名節嘗偕邑令陸天濤及
諸名流結江皋吟社并梓世德堂古文詩集行世子天
潤字彙霑進士由保安令擢刑部主事有政聲

季宗文字公思性 重樂施予不事生產尤篤友于弟宗
孔字公聘宗彝字公懋並敦古處白首無間言壽皆八
十餘宗彝諸生以子芳藹貴贈如其官

王世珍字載甯國學生豪邁尙義捐貲建馬鎮石梁以惠
行者閭里德之

祝純嘏字帖斯諸生父早卒孝事其母性好編纂江邑掌
故尤多所訂正嘗蒐輯鼎革時殉義姓氏事實錄爲一
編偕邑人士籲當道上其事奉

俞旨八祀忠義祠者二百八人其未經入

告由大史準附祀者七十八人又嘗董修學宮十餘年釐訂典禮

江陰縣志

卷十八

人物 耆舊

二十八

成釋奠考一書旣歿逾年學使朱方增爲文表其墓

夏 模字思範歲貢生選霍邱縣訓導未赴任家居吟覽
至老不倦道光十六年年八十三重遊泮水

薛文淇字度汪附貢生性淡定言動不苟善圍棋嘗靜坐
一室讀書自樂道光十七年重游泮水學使龔守正給
泮水重賡額壽八十八

周象山字錫九楊舍人慈祥樂善倡捐本鎮同善堂壽九
十有二子浩字肇堂國子生樂善好施創建同善堂捐
田一百五十餘畝錢二千緡壽八十餘

趙同驥字午涯嘉慶癸酉舉人令高安厯署繁劇所至有

惠政道光二十五年重游泮水五代同堂鄉里榮之年八十有七

許 熊字崑望諸生成豐六年重游泮水

程 玠字晉揚諸生澹泊寡營足跡不入城市者四十餘年八十弟珍字殿揚太學生喜吟詠著有百泉吟稿
耄年兄弟風雨聯牀怡如也年八十有一

殷 讓字純良孝友敦樸年九十學使彭久餘給齒德兼尊額

胡念劬字燦然性情純篤好讀書至老不倦年八十九游庠九十卒

江陰縣志

卷十八

人物 耆舊

二十九

百歲耆壽五代同堂 附

宋吳仲宣壽百歲澄江門外仁壽坊以之得名

明趙 璞字怡門壽百歲詔賜冠服

徐 輗壽百歲

國朝王 鼎壽八十八歲有曾孫九元孫二五代同堂乾隆四十九年

詔給昇平人瑞額緞一匹坊銀十兩

吳 鈞字和齋監生嘉慶十六年壽八十三五代同堂

詔給昇平人瑞額緞二匹十九年助賑議敘從九品卒年八十六

陸 塗字鳳鳴壽百有二歲

吳乃銘字德新道光三年壽百歲

詔給昇平人瑞額坊銀三十兩

劉大楷字品端秉性樸誠道光二十五年壽百歲

朱觀揚壽八十八有曾孫十三元孫二五代同堂咸豐

二年

詔給昇平人瑞額銀十兩

袁鳳占壽八十七子二孫六曾孫七元孫一五代同堂

藝術傳

元呂逸人善醫施藥濟人嘗活王逢之門人張敘逢贈詩云貧士願畱賒藥券故人思續衛生經

明張體字孟膚隸書學董香光金錯刀法作顫掣勢行楷及雙鉤書皆得古法

相禮字子先畫學黃公望尤精弈王世貞宛委餘編推其弈品爲天下第一

陳耘字德耜工詩善書永樂中以楷書舉與修大典擢山東道御史遷浙江按察司僉事著有清約集

朱熊字惟吉以善弈著天順中歲饑奉父積命出粟賑

江陰縣志

卷十八

人物 藝術

三十一

飢徵入官通政司知事

夏範字禹疇官中書精楷篆以書太極殿榜稱旨賜賚無虛日嘗召入禁駕未出諸宮侍展縑綺爭乞書裏金銀豆爲潤筆攜滿袖歸嘗充正使封藩翰林劉城副之蓋異數也歷官通政司參議請老歸

吳元良字善夫家貧好遠遊書法二王晚學山谷得其堅勁之致畫蒼潤無俗筆

是巨淵得異人授號神醫一男子吻舌流血不止巨淵急拾東壁螺殼投患處卽愈蘇郡富家子病大熱羣醫不效巨淵鑿地爲坎令臥其上沃以泥水須臾愈或問故

日是多寵妾中麝毒也其他治效類是朝命徵入意不樂采藥草傳身成癩使臣以惡疾聞遣回仍以藥塗身而愈

林 懌醫宗丹溪心法治多奇效稱中菴先生當事重其行誼再致賓筵孫時亦以醫名

袁文可字半村家貧性介畫山水工麗極爲文壽承所推重貴游求之多弗與曾作漢宮春曉圖經年乃就傳至都下名動公卿間

陳 棠字明懷畫做元人貌海棠尤工世隸中書畫局以爲卑渫戒子孫勿襲子三綱亦工畫海棠

江陰縣志

卷十八

人物 藝術

三十二

呂 夔字大章本姓承依舅氏從其姓易儒而醫一時神其術呼爲呂仙吳中疫裏藥囊日治百家全活無算大吏給章服不受嘉靖間隸太醫院著有運氣發揮經絡詳據脈理明辨治法捷要等書子講字明學讀字明經醫名俱如其父讀子應鐘字元聲太醫院吏目傳禁方而變通之能望氣決人死生或談笑閒療人痼疾好客好山水好詩孫文介銘其墓著有葆元行覽世效單方兩書又有長春堂詩稿

高叔宗字子正諸生能詩善書尤精醫著有資集珍方高寶爲之序同時有邢濟川者並以善醫聲著東南王世

貞有贈濟川詩

繆 坤字子厚其先以醫名者七世坤名尤著性行淳篤
自察脈審方外端居誦讀不接塵事嘉靖閒帥府延至
軍前療疫全活甚夥著有方脈統宗行世與鄉飲十七
次壽九十自志其墓

顧 儒字成憲以子言貴受封少業儒因侍父疾遂通醫
投劑無不效不問貧富貴賤雖寒暑風雨隨叩輒赴布
袍徒步診切不怠忘其爲封大夫也遇貧者予之藥并
佐薪米其尤異者以三指切人脈決榮枯修短無不奇
中壽八十六里人私諡爲慈惠先生著有簡明醫要五

江陰縣志

卷十八

人物 藝術

三十三

卷顧端文序行之

莊履嚴字杏暘能詩工醫著有醫理發微

戴 仁字元夫善鼓琴得太古之遺自號琴泉薛章憲爲
作歌贈之

朱菊叟逸其名字世以藝圃家西郊喜栽奇種不遠數百
里求之菊尤所珍植賣花遇解人不堅索價人或載酒
過之或出酒醉客婆娑花下語雜莊謔恆竟日不厭嘗
揭句楣間曰種花無稅不愁官萬歷己未有上臺以索
隔年寄植盆花萎擄之幾殆曰自今無歲不愁官矣戒
子孫勿復學爲圃

國朝闕 疑字不疑善畫梅尤精雪月兩種疏影暗香落筆
生動吳宗閏善畫蘭一花一葉別有逸致人並寶貴
張 拙字任天工草書飛白擘窠大字性豪喜飲詩歌不
假雕飾曠然有塵外意舍旁積土爲小山號曰庸山故
又自稱庸山居士求書者屢常滿從容應之不倦
戚秉恆沈綬黃五辰陳明祈俱能醫沈著山林相業十卷
藏於家黃有醫宗正旨六卷行世陳應埴亦以醫名戚
宗揚宏治朝名醫秉恆克纘祖緒咸稱世醫云

周榮起字硯農高起弟明諸生能詩文工書畫究心六書
汲古閣刊板多出手校女淑祜淑禧亦精畫淑禧尤著

江陰縣志

卷十八

人物 藝術

三十四

兼能詩其畫點染生動神采煥發翎毛更入微妙年八
十餘猶不倦人有得其片幅者爭寶之陳繼儒題其畫
曰花有露鳥有聲能令造化無權硯農有此才女使人
不復羨謝家也

王 洲字次微衣冠古朴如其人善山水尺幅尤佳嘗圖
澄江八景纖息入微筆底別具閒遠之致

錢 璞順治間人寫梅稱能手尤精鴈鴿飛鳴爭息各極
其妙子鏗善畫荷師郡人唐光名播一時

周如松字公茂少患怯棄儒習醫醫成不欲以術鳴治人
不輕立方投劑多奇驗

程邦連字旣白習醫精研丹溪諸書決生死百不爽一工詩能書卒於維揚

葉時隆字茂之自明初卽以喉科傳家時隆年十八早著名治危症能立效八十外猶應接不倦子孫世其傳

戚 贊字聖俞諸生名醫秉恆孫精世業有隱德遇貧困求醫與之藥輒以零銀暗雜其中周急且不欲人知也著有傷寒心法行世王百朋字錫我亦以醫名並稱國手

祝道行字明侯好學精醫康熙二十年大疫奉文施藥加意問切投劑多活性喜周急立心行已有古人風

江陰縣志

卷十八

人物 藝術

三十五

錢 注字汗涉祖時用父鼎鉉世以刀圭稱注紹其術危險外症治無不痊

王文煥字亦唐精幼科治痘罕有其匹事母孝能菽水承歡

司馬鴻瑰字雲從世業醫尤精幼科求治者戶外屨滿必先貧乏有所入輒以周兄弟諸姪之急子廷標字傳一承其學於古書能通變用之遇痘科之險絕者輒能起死回生

湯士偉字子迴書法學趙松雪北遊十載書愈工能於半扇面寫西廂曲一部無一簡筆以薦入明史館校勘授

縣尉

李 暘字不淄耽金石刻家藏極夥善書求者趾相錯
湯若宰字而洋畫仿趙孟頫又從王翬遊盡得其法晚年
杜門課子壽八十七著有鋤雲詩草

張世鉉字聽玉篆書樵秦漢行誼有古君子風弟世鑑字
寶臣爲諸生有名能詩畫

韓 袞字維能工貌花鳥深得徐崇嗣沒骨法亦能作落
墨花

瞿 上字雲表畫翎毛花卉色入妙尤精寫真得曾波
臣秘法後人世傳其術

江陰縣志

卷十八

人物 藝術

三十六

李 和監生寫真師瞿上山水師王原祁康熙間與繪
萬壽圖

召入武英殿供奉以母老乞歸

蔣 森字清度能詩工寫山水極自貴重不輕落筆
蔣鶴齡號白石山人善導引工鼓琴有同姓暉字長庚學
琴於鶴齡得其指法時並稱之

夏時用字廣颺究心青鳥之術以郭璞葬乘生氣爲主編
質於四方之精堪輿者而得其真積二十年術益精語
無不驗性矯矯不與流俗伍卒以窮愁老時有費大章
字承烈家華墅亦以堪輿名

王公爽善堪輿家言行道於丹陽金壇及江以北著書多訂前人疑誤其言龍法謂楊氏龍分兩片之說最確宋人云三支並出者誤也沈進士地學一書實出其指授今盛行於世而公爽自撰書惜無爲之刊布者

高 方字義立父際飛以篤行聞方善二王書法及大小歐陽體小楷尤工好遊覽欲盡歷宇內名勝嘗客都門鉅公某重其名將列薦牘拂衣歸游匡廬道池州山水陡發沈舟卒僕蕭雲己遇救登岸以救主復蹈淵致斃方著有于于道人集都門小刻及言行曲直論弟京字德立亦以書名

江陰縣志

卷十八

人物 藝術

三十七

沈 鳳字凡民監生任安徽徽州府同知七攝縣篆於吏事非所長善八分書工畫山水瀟灑縱逸不減元人尤工篆刻古麗精峭如斯冰復生著有謙齋印譜金壇王澍序之

聞 詩字蓉曦性恬淡工書及詩所居有醉雲樓與交遊唱和其中王澍嘗主其家與譚論書法著有吾廬詩草曹 沂字思魯能詩工畫蔡志所繪各山圖及澄江八景皆出其手

戚漢廣字滄亭烈愍之從孫諸生工文善書筆力遒勁徐南金字品三監生任俠有勇力有熊髯者拳勇絕人南

金求其術熊授以少林法鍵戶習之期月功成擅名江
南北有兩弟善手搏嘗過郡城入廟觀劇以睚眦擊傷
人衆健兒突起圍之數重棍槊蜂集南金適來猱進揮
霍眾披靡翼兩弟一躍出歛如風雨僉知爲南金相顧
錯愕釋杖羅拜各解散自是益自韜晦坐一室讀書蕭
然如老生嘗讀易未通其旨入定山僧舍枯坐月餘遂
洞悉其本末尤喜老氏書工書弈能爲古文詞
車鳴鸞字去非書子諸生書法紹其家傳雅有典則
姜 禮字天敘精醫術其治病立功過格日記得失著有
仁壽鏡本草搜根行世子孫世其業

江陰縣志

卷十八

人物 藝術

三十八

嚴宏滋字不緒監生善書畫乾隆十六年及二十二年
聖駕南巡恭獻畫冊

恩賞緞匹

蘇廷蔭字南棠精內外科遇貧者施以藥雖參耆勿吝子
泰以醫得官

蘇士藻字萬彙工書郡中二吳第一樓額其手筆也
陸應陶字勳遠能醫治痘尤專門險症無不愈
程 鐸字振凡諸生精天文勾股篆籀之學尤工篆刻補
欽天監博士供奉

內廷凡

宸翰牙章三十體精心摹刻隨其大小方圓皆合古法刻成藏秘閣亦榮遇也有四箴堂印譜行世楊文定爲作序黃勳字又癡性傲嗜酒畫山水規黃公望尤工棧道行驢醉則益神其技惜所如不合卒於僧舍其徒高雲麓亦善棧驢

王廷選字一鶴武生善墨竹筆底瀟灑具有煙雲逸致爲人亦落拓不羈

夏敬聲字大夏監生書規趙孟頫畫倣惲壽平兼工鐵筆秀媚可愛性雅潔遇俗士則怫然不顧

王恪字遠謨監生善蘭竹嘗於所居之松濤閣集書畫

江陰縣志

卷十八

人物 藝術

三十九

社拳勇亦擅絕一時又善彈丸甥徐承祖字懌齋師其畫亦以蘭竹名

王相字鍾岳熟於素問難經曾寓吳門賃居葉天士宅旁葉以難治辭者就治輒瘳葉大奇之

姜健字體乾繼祖父醫學而術益精晚年好易於五運六氣陰陽變化闡發甚精故能投劑如神決生死不爽里中業醫者多得其指授從子大鏞字鴻儒監生亦善醫工詩著有鳴秋集調鶴山莊醫案

趙綱章衣冠古樸沈默寡言熟於仲景方書切脈投方無不應時而愈

蔣清怡字素書父鳳池工書畫兼通醫理有名諸生間清

怡傳其家學畫得元人意而參以米法

繆炳泰字象賓善寫真客京師公卿爭相延致名動

九重以監生

召入便殿恭繪

純皇帝聖容邀

睿賞乾隆甲辰

聖駕南巡

召試賜舉人授內閣中書遷職方司郎中從子宮桂字一山能繼

其法嘗在衍聖公第臨明太祖功臣像神致弈弈如生

江陰縣志

卷十八

人物 藝術

四十

李 基字德容幼習賈暇卽染翰臨池得二王筆法

孔廣居一名千秋字堯山工詩究心六書之學善篆隸工

鐵筆著有說文疑疑行世嘗闢生壙自撰志銘屬梁同

書書之手自刻石子昭孔字味茗性古淡亦以鐵筆名

李 穎字小尹能詩善書行楷俱莊重不苟學書者爭師

之間畫老梅多古致嘉慶庚午以年老

恩賜副貢癸酉

賜舉人著有蓉山詩草沈德潛爲之序又輯樵餘漫筆二卷多記

江上佚事

蘇 溶字安瀾生平孝友醇謹篤信小學一書善畫山水

及人物花卉兼工書法

陳繼德字晉亭監生持躬端謹母年登大耋孝養備至性好利濟工篆書精鐵筆刻有繩齋印譜

張瑩字懷白工畫山水尤善寫真一點一拂飛動有神致

龔陞第字聞海拳勇過人有鎮洋張某慕其名來角技偕至廣福寺殿聞海卽以一脚踢柱柱移數寸隨手扶正張某咋舌而去

張廷燮字羹梅增貢生精天文醫理嘗自製渾天銅儀加日月輪以候晦朔弦望節氣時刻與時憲書不差黍

江陰縣志

卷十八

人物 藝術

四十一

凡遇沈疴决生死多奇中求治者踵相接焉六嚴字德只亦精象緯句股之學製渾天球刊恆星地輿圖行世夏挺芝字再陽諸生積學立品工二王書人爭寶之賈明法字懷清天資靈敏工詩善畫凡天文地理及卜筮諸書靡不精討著有同聲音韻集

孟起鳳字漁疇諸生傲岸不羣以善書名

沈祐丹字梓堂天資明敏工於吟詠書法逼近歐陽尤長於擘窠大字索書者踵門不絕

吳景范字濟亨精倉公術治無不驗學使王以銜給春滿上池匾額周系英貽以得倉扁傳洞明五內精岐黃術

名滿三吳聯句

汪保泰字瑞峰善圍棋意遠神閒時無敵耦

費椿齡字庚延諸生性沈摯精於醫理活人無算

陳瑚字子珊諸生工草書尤善畫蘭竹花卉自號健餘
老人

吳士瑛字甫田太學生熟於素問諸書著有痢疾明辯萬
青藜爲之序

戴浚字湘甲諸生性古樸博學能文精數學邑令陳希
敬逸脫重犯造廬請卜應驗如神製聯句贈之

楊熙楸字暢園諸生工詩善畫尤精竹石有石刻數種傳

江陰縣志

卷十八

人物 藝術

四十二

撮

張喬字萃山精鐵筆細入毫髮有楮葉亂真之妙嘗刻
桃核兩枚一爲瀛州十八學士一爲東坡與一僧一客
同舟游赤壁船窗可開闔篙工奚童諸器畢具觀者驚
異凡所摹泐書畫人爭購之

吳烜字孔彰太學生善畫獠惟妙惟肖兵燹後田地荒
蕪勸鄉人種桑育蠶著有蠶桑捷效

僑寓傳

漢杜 康字仲甯城東南有杜康宅杜康墓

晉劉 伶字伯倫沛國人城南有劉伶巷劉伶墓

庾 冰字季堅城東北有庾冰宅宅南曰庾冰巷

郭 璞字景純聞喜人以母憂去職卜葬地於暨陽去水

涯百步許宅在黃山北長廨村

唐陸龜蒙字魯望吳郡人嘗寓芙蓉湖與皮日休魏璞載

酒賦詩自稱江湖散人或號天隨子甫里先生

宋蔡 襄字君謨娶江陰葛惟明女悟空寺有其題壁詩

六章

江陰縣志

卷十八

人物 僑寓

四十二

元倪 瓚字元鎮無錫人工詩畫娶江陰蔣氏元末盡散

家財奉母移家江上明洪武七年歿於長涇夏觀家歸

葬軍帳山

明瞿 杲字炳陽五衢人僑居江陰之龜山性嗜酒自號

醉漁畫花鳥有名蘆雁尤入高品自謂作翅不及林良

因變姓名給事良門下覘其用筆忽得解失笑良曰若

非瞿醉漁耶乃定交去

國朝陳 功字凱侯崑山人明崇禎中獻策授通判運糧遼

海累著奇績鼎革後隱於定山善寫竹石爲詩歌以自

娛年七十三卒子元一廬其墓遂家焉

王文法字伯度由新安寓江陰少美姿容一婦人悅之以計誘文法不顧其族人有不法事賂文法二百金叱去之亦竟不暴其事

陳璿字衛公宜興諸生博極羣書工詩古文康熙中僑居邑之邵公祠年八十高燦繆詵以前輩禮待之每談勝國末年事雪涕如雨喜論史漢問字者趾相錯

巴文字國華休甯人善騎射任俠好義明末家破寓邑之周莊鼎革時四鄉兵變肆劫文躍馬持刀禦之追至砂山手刃十數人散其眾既而仇家誘歸醉以酒夜半欲磔之有老嫗壯其貌縱之去性好客所與遊皆故明

江陰縣志

卷十八

人物 僑寓

四十四

逸老卒葬砂山

杜濬字于皇黃岡人以詩文名海內龔鼎孳吳偉業輩推重之鼎革後棹舟游吳越間遇故老遺民輒慷慨悲歌不能自己初客金陵轉徙淮揚及奚司馬祿詒莅江陰其外弟也招之寓江上適閩中余懷桐城錢澄之建昌曾燦無錫錢肅潤俱至有江干五老之會一夕登君山縱飲極醉忽狂叫起舞口占十律繼以大哭乃歸與邑中徐章趙鳴鑾蔡鵬爲詩友書法奇崛詩意悲壯至今人多珍之

蔡仁溥崇明人家巨萬遭明亂盡散與族人子身寓邑之

白石山自號白石山樵教授村中與華山和尚交最善和尚不知何許人語似楚音順治初來瓠子岡棲社神廟困履易食見人不語而笑人問之益大笑每當山水佳處顧影臨風破顏鼓掌人稱爲笑和尚又有哭道士者亦與遊常往來於席帽山

韓文輝字山如蘇州諸生遷居邑之西城博學能文號春秋專家學使許汝霖延爲邑中經師縉紳登高第者半出門下著有春秋集成

吳衣若無錫人父戍瀋陽衣若賣其妾治裝走戍所誓不反顧子金書寄食僧舍憔悴無人色邑人包龍章見之驚曰孰令孝子子若是者延師教之讀妻以甥女又十年衣若負父骸骨歸金書奉父僑居祝塘之西莊金書字禹三著有離騷經解梅菴詩草

譚琦字二雲旌德人負才藻鼎革時

大兵徇徽州得琦將斬之歎曰吾無他恨惜詩文不傳耳帥聞命賦梅花詩頃刻口占七言百首帥大悅釋之後卜居邑之祝塘工草書得懷素神髓詩文散軼猶有存者黃晉良字處安福建人性豪喜飲醉後作書累數十幅不倦詩爲嚴繩孫高士奇輩所推名滿吳越人比之王穉登云僑居十載旣老乃歸

龔 誠字羽階常熟人僑寓邑之北角品高行潔家徒壁立嘯歌自若工詩及書得之醉後者尤佳著有白谷集施維岳字崧山吳門諸生能詩兼精易數乾隆十二年挈家來祝塘垂簾賣卜多奇中暇卽吟詠自號二梅居士其五言詩有云野隨芳草闊天帶斷雲飛雲似無心客山如入定僧夜睡無燈早晨炊借米遲皆傑句也楊夢槎字載騫無錫人父楚宮贅江陰張氏生夢槎登鄉薦官四川酆都令隨征金川死木果木之難贈道銜無子蔭其弟爲知縣後改雲騎尉世職以弟之子襲

邵辰煥字星城金匱諸生曾大父曾訓以工詩善書名於

江陰縣志

卷十八

人物 僑寓

四十六

時娶於江陰因家焉亦工書尤長于詩著有傳硯堂集張 式字荔門無錫人僑居華墅砂山東麓刻苦勵學爲孫原湘高弟大吏羅致不就翁文端李兆洛激賞之著有經義疏證及荔門全集紀游諸書

曹志深江西新建人工詩善書侍父文恪視學江蘇爲杜氏贅壻子福筠以舅氏籍入邑庠殉庚申之難孫增賜復曹姓邑庠生居祝塘鎮之陸家橋

章 敏字藕溪常熟人工繪事名噪一時有石刻傳搨寄居城中小塔巷

江陰縣志卷之十八終